

浙江文叢

傅雲龍集

〔第六冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

傅雲龍集

〔第六冊〕
纂喜廬文二集(三)

〔清〕傅雲龍 著 傅訓成 點校

簪喜廬文二集卷六

游歷美利加圖經敘

《周官》既有懷方、合方、訓方，而復以土訓道地圖，以誦訓道方志，以小行人籍其利害禮俗政教爲書，以外史掌四方之志，內史讀之，此豈好苛愛博可同日語歟？《詩》列十五國風，鄭康成《譜敘》謂欲知風化芳臭氣澤則旁行以觀之，孔子作《春秋》，有取於百二十國書，傳稱左氏能讀九邱，孔安國謂爲九州之志，設當日騶衍九州，談出目驗，地背舟車，罔聞戶庭，其道圖、道志更不知若何亟亟也。雲龍遵朝諭出洋游歷，既述《日本圖經》，以美利加合衆國圖經繼之。夫記日本事之專書出自華人數數觀矣，而此則渺然難不在此。《瀛環志略》簡明有聲，證之歐羅巴洲非不其然，而美利加十不明一，耳食非歟？然而難猶不在此，苟爲簡而已乎，奚云知其當然？苟爲不簡而已乎，又奚云知其所以然？美利加非有同文之書、同倫之行，而培克一憤，生聚百年，其強何以自雄，其利何以有出藍勝藍之慨，彼豈適然而致耶？泥古者既不屑道，自積習者爲之又嗜所嗜而止。嗟嗟，彼人於中國地理民生婦孺類能言之，而一物不知，恥復何如，況有游歷責耶！此雲龍所以竊不自揆，弗欲貿貿焉空勞跋涉而力爲其難也，而非隨

地與人與時，末由銖銖而積之，絲絲而理之，非無遺地也，無虛地耳。光緒十四年雲龍游嘉里符尼亞邦，而阿里瑣那部，而紐墨西哥部，而德格瑟斯邦，而魯西阿納邦，而密士昔比邦，而阿拉巴麻邦，而佛勒里答邦，而若爾治亞邦，而叟司喀爾勒那邦，而諾司喀爾勒那邦，而勿爾治尼亞邦，而華盛頓都城，而紐約邦，而賓夕佛尼亞邦，而馬沙朱色士邦，而窪蒙邦，而瑪理蘭邦，而特納窪邦，而紐折爾西邦，而干捏底嘎奪邦，而洛答埃倫邦，第而曰考河工於紐阿林，考船工於三法蘭昔斯哥，考鎗礮水雷工於費納的費牙、波士登，士兵非里云爾哉。明年歸自秘魯、巴西，復由華盛頓都而游威士奪勿爾治尼亞邦、倭海約邦、英釐阿納邦、伊利那倚斯邦、愛呵窪邦、歪阿明部、尤達部、列法達邦，以至嘉里符尼亞邦，蓋合衆國邦部凡四十有八，雲龍擇厥大要游五之四。

曷言乎人也？照料如章者張大臣也，而質疑時則有贊使徐壽朋、彭光譽，隨使梁誠、何慎之，而譯文時則有澤邨繁、林夙三、初山逸也逸也其名、丙維禮，而置郵考異時則有雲龍子范冕、范成，而以諸說之聚訟，辨惑於丁建良，而以畫一之斟補，責成於雲龍子范初。所可異者，美利加人初無一面而叩輒鳴，若惴惴焉懼舌人未盡欲言，以指代口，以圖佐冊，罔或一吝。

曷言乎時也？雲龍初苦航潮，高輒數十尺，食不得咽，然腹稿未嘗須臾間，久之習風浪，著書餐桉如閉戶，車軒屬草無論已，憂勤而生，彼人亦以雲龍爲耐勞。瓜期已逾兩月，銅版圖成遂旋，罔敢以家事艱難少輟鉛槧，晝夜鈎索，未嘗不欲銳一再游之心力，洞數十年之學識，而

猶有知有不知，時限之也。雖然，向第知中國京師午正爲彼都寅正六分，即《周髀》東日西夜意，而今乃恍然於迎日順日之增減。向第知器利寶興，即梓匠卅人名官意，而今乃恍然於人力孰若風力、火力、水力、電力之爲愈也。向第知人盡知兵即古者兵農合一意，而今乃恍然於額兵三萬之汰弱，以無糜食佐富，以無濫竽致強。向第知文武不分即六藝書射意，而今乃恍然於無不學之水陸軍將。向第知電學之創，格致學之因，即含萬物而化光意，而今乃恍然一無剿襲以給文憑故。嗟嗟，彼自問弗如中國者，聖王之道之無不貫、而以仁義爲本耳，今且有以中國孝治天下爲文者，善於取法，多此類也。於是雲龍就測地制器、知兵通算，分之爲類十有二：曰天文，曰地理，曰河渠，曰國系，曰風俗，曰食貨，曰考工，曰兵，曰外交，曰政事，曰文學，曰敘例，爲子目一百六十有二，爲卷三十有二，篇第相承，一如《游歷日本圖經》例。自爲敘曰：

地承天成，背面時行，緯南一度，偏東西經，述經緯表第一。彼國百年，歲月同遷，表異於同，莫爲之先，述中國美利加月朔表第二。言地動始，易有厥愷，南短北長，日景異視，《周禮》土書，法已寓此，述中國美利加較時里差表第三。溫帶之北，乃同中國，氣亦有差，赤道離即，述寒暖平均表第四。何澍何霽，一空氣系，阿拉士克，雨非它例，述晴雨表第五以上《天文志》。神農計里，是輿圖始，南侈北斂，地背天視，述地圖第六。探新地者，科命布也，以言國疆，足跡勿假，述疆域原始第七。勿食如蠶，邦部同甘，今四十八，初盟十三，述合衆國沿革第八。華英里歧，測方何辭？既測廣袤，又水陸之，述合衆國方里表第九。一洲足多，在海之阿，英屬而

外，鄰墨西哥，述四至八到表第十。音以文符，言人人殊，自戒矛盾，非判主奴，述合衆國名稱歸一表第十一。類自彼分，從而云云，否則滋疑，將毋絲棼，述邦部分類表第十二。東西海環，營兩山間，別開生面，亦津亦關，述合衆國形勢第十三。輪軌既平，六街如枰，白屋非重，議院非輕，述合衆國都第十四。昔無都會，蒼涼猶繪，而海市闢，紐約其最，述通都大邑第十五。邨非不有，難毛舉某，無如郡者，陳言否否，述合衆國邑第十六。海不一灣，曲潮汐間，紐約其大，商船往還，述海灣表第十七。灘不畏淺，有標則顯，礁不懼多，有識則免，述海濱雜識第十八。國亦島耳，環峙何似，如立如拱，岬峽附此，述島表第十九。霞標雲逐，蜿蜒鴻陸，押與落機，二山起伏，述山第二十。山不讓壤，集益在廣，亦既見聞，作拾遺想，述地輿雜識第二十一以上《地理志》。亦河亦渠，惜尠專書，推桑經例，地背權輿，述水道第二十二。河亦有分，巨浸罕聞，衆流一萃，勿慮緒紛，述水道合流表第二十三。河澹海鹽，湖水其兼，述湖表第二十四。伏流瀑布，往往而遇，橋斜天然，洞疑無路，述水道雜識第二十五。築堤則功，導流則通，黃河異此，工將毋同，述密士昔比河工說第二十六。疏口未已，測水其始，厥害弗忘，厥利乃起。鐵道欲周，官民交修，水陸倚伏，今車昔舟，述渠工表第二十八。利不止農，亦商亦工，述水利雜識第二十九以上《河渠志》。變世及規，四載爲期，既衆舉之，或再任之，述世系表第三十。其正不虞，其副前趨，述副伯理璽天德表第三十一。轉敗不危，得土不私，是識時者，附阿但斯，述華盛頓傳第三十二以上《國系志》。其白則那，其信猶多，述形性第三十三。氣類或參，大較有三，述族類第

三十四。南北二黨，議輒抵掌，述黨目第三十五。衣冠平均，在位同民，述服飾第三十六。刀勺是供，穀食非宗，述飲食第三十七。異英蓋寡，偶仿羅馬，述居處第三十八。習與嗜俱，何足異乎？述俗禮第三十九。例之以英，亦沿亦更，述歲時第四十。土著鄉曲，亦移舊俗，述土人風俗第四十一以上《風俗志》。戶冊里編，買奴革前，國會之計，期以十年，述民數表第四十二。坐食其免，無業者尠，以利爲權，擇術爭先，述民業表第四十三。業既類分，復錄所聞，述民業雜識第四十四。公地何義？國會之地，述邦部公地表第四十五。人五萬聚，三十有五，述五萬人以上地表第四十六。已成野格，其直有額，述地直表第四十七。產不訝奇，適用亦宜，述物產第四十八。稻田亦闢，不如尚麥，玉米次之，土人充積，述農產表第四十九。孰博孰約，非要則略，述食貨表第五十。合農工商，而綜厥常，述財產十年一計表第五十一。鹽場幾增，亦創亦仍，述鹽表第五十二。鹽質轉奇，多識奚辭，述鹽法雜識第五十三。蔗糖其一，歲計所出，述糖表第五十四。種五十餘，擇要而書，述酒表第五十五。雖遜古巴，厥產亦賒，述淡巴菰表第五十六。油種不一，其用勿失，述油表第五十七。布織之謀，不疵取求，述棉表第五十八。紛弗如湖，厥人歲輸，縑之治之，如棼則無，述絲表第五十九。毛織非低，與棉絲齊，述羊毳表第六十。鑛不獨金，雜類分尋，述鑛類繫地表第六十一。誰歟鑛珍？曰金曰銀，述金銀鑛繫地表第六十二。舟車輪開，相需在煤，述煤鑛表第六十三。辨鑛有苗，火力力超，述鑛務雜識第六十四。金直如何？紐約商多，述紐約金直低昂月表第六十五。利用以時，經之營之，銖

銖不爽，意杜漏卮，述造幣金銀表第六十六。國都之局，造幣紙足，述合衆國紙幣表第六十七。有用有存，就冊數言，述銀鈔表第六十八。關稅之據，商賈之著，操券而獲，無欺忌慮，述官局印紙表第六十九。存者無虧，用者無疑，國之盈羨，而寓商規，述銀行表第七十。債以貧成，利以富輕，非專國會，易舉衆擎，述國債表第七十一。利勿過索，違有罰約，述利率異同表第七十二。用綜內外，工兵其大，量人之出，其亦何害，述出入表第七十三。勿濫勿隘，國會是戒，述國費總目表第七十四。內稅之規，罰緩隨之，述內稅表第七十五。農工勉勉，商爲流轉，國外之商，非由此選，述邦部互出食貨表第七十六。出入盈虛，今復何如，述輸出輸入年表第七十七。出無虛歲，十年一計，述食貨輸出比較表第七十八。祛出入弊，卅年一世，述三十年間食貨出入比較表第七十九。勿謂善賈，衷或舛舞，述合衆國損本商表第八十。免毀與襲，庶其思集，述許專售年表第八十一以上《食貨志》。善事利器，周官遺意，惟專則精，匪過人智，述考工源流第八十二。居肆以成，而恥平平，述工廠合表第八十三。兼營其常，專門者良，述工類表第八十四。工始新英，利視技成，述新英邦工廠利率表第八十五。工費未央，舉其彰彰，述土木工費繫地表第八十六。鐵軌不頗，華工居多，洞若觀火，無飾無訛，述鐵道考工第八十七。樞輪累陸累陸之言軌也，分部爲六，述鐵道繫部表第八十八。其冊足徵，軌與年增，述鐵道年表第八十九。道存其人，工商相因，述鐵道增人百分率表第九十。圖始其難，而費莫殫，勿慳勿濫，商勝於官，述鐵道費表第九十一。寬狹難同，而用其中，軌成俄傾，利器省工，述鐵軌表第九十

二。鐵不若鋼，而韌者良，述鋼鐵比較表第九十三。厥枕維木，其直伸縮，木取不朽，誰歟其久，述鐵道枕木表第九十四。勿卽於陷，此其借鑑，述鐵道舛軌表第九十五。日利百金，何匿何侵？述鐵道利表第九十六。運直愈廉，獲利愈添，述它國鐵道運直比較第九十七。漚輪勝馬，市有兼者，述火車街車工表第九十八。易帆而輪，創自西人，重甲之鐵，亦善於因，述輪船考工第九十九。此非兵艦，帆輪無減，述船表第一百。明輪暗輪，湖濱海濱，述輪船年表第一百有一。十部輪舟，載亦或侔，述輪船分部頓數表第一百有二。水火之濟，各精其藝，述工廠水力漚力繫地表第一百有三，十年一變，考工易見，述工廠水力漚馬力比較表第一百有四。力倍工半，成物非玩，述水力漚力繫工表第一百有五。火力競資，水或過之，技也進道，善無常師，述水力漚力巨工繫地表第一百有六。礮鋼之力，難云徵實，其伸其縮，勿僞勿失，述陸軍礮局試驗礮鋼表第一百有七。鐵用紛然，視地與年，述鐵條工年表第一百有八。紡筒萬千，機力蟬聯，述棉花工器十年一計表第一百有九。絲工所會，誰歟其最？述紐約治絲分類表第一百一十。學始神農，交感則鎔，述化學藥物工繫地表第一百十一。寄意寄音，飾銀飾金，此其淺者，技亦從心。述電工繫地表第一百十二。嗟彼酒傭，亦其大宗，化學資之，爰考厥工，述酒工繫地表第一百十三。取博於約，聊補將作，述雜工繫地表第一百十四以上《考工志》。軍不習練，百不當一，諸葛之言，暗符無失，述兵制第一百十五。分不挫鋒，合則交衝，陸戰百變，勿離其宗，述陸軍選兵表第一百十六。短舍長諳，邦原十三，述十三邦陸軍表第一百十七。所以勸也，靡

不足者，述陸軍官祿表第一百十八。一隊名奇，曰康拜宜，里基門脫，三營奚疑，述陸軍繫地表第一百十九。練有專門，厥師水屯，環海一航，有深意存，述海軍官弁表第一百二十。鏖戰餘生，卹之有成，述卹戰士身家十八局表第一百二十一。勿通狹流，阻道是謀，孰沈孰定，而亦有浮，述水師阻道說第一百二十二。水陸臺誇，船礮或加，勿曰鐵石，而遜泥沙，述礮臺經驗說第一百二十三。如碁之布，如星之羅，少安勿躁，兵不在多，述陸軍營房表第一百二十四。局廿有三，藥彈爭諍，述兵器局表第一百二十五。開花彈馳，微鐵孰支，雖非西最，多自爲之，述兵船表第一百二十六。宜與不宜，兵艦說歧，執兩以用，勿倚勿遺，述兵艦雜識第一百二十七。重礮宜船，合度勿偏，尺測則準，聲則輒先，述船礮經驗說第一百二十八。無煙無聲，精且求精，源流視掌，豈曰識名，述水雷第一百二十九。敵或借視，罔兩怯此，述營燈第一百三十以上《兵志》。邦無外交，國約罔淆，述中國約表第一百三十一。華使之先，光緒四年，述中國使臣表第一百三十二。外使其來，厥館競開，述別國使美利加表第一百三十三。視途不畏，華黎往毅，聊復僑居，入籍則未，述中國人至美利加年表第一百三十四以上《外交志》。其制不同，而下情通，述合衆國制第一百三十五。遜議紳權，而無冗員，述官制第一百三十六。網疏易狎，而重犯法，述刑略第一百七十七。爲省繁計，一如呂例，述大事編年表第一百三十八。車書未同，較之以中，述中國美利加權量衡比較表第一百三十九。星郵日新，難例陳陳，述郵便表第一百四十。電里線里，難一例視，線繞或歧，誰歟董理？述電線年表第一百四十一。曰得力

風，竭來線通，述電話機繫地表第一百四十二。潰濫防川，而說紛然，院紳一議，萬本四喧，述新聞紙繫地表第一百四十三。亦卹亦防，或暫或常，述雜事第一百四十四以上《政事志》。派奚取諸，莫格致如，述學派第一百四十五。電學始名，誰歟與爭，述美利加電學第一百四十六。程以功云，制禁緒紛，厥類不一，聚而不分，述學目第一百四十七。字母云者，本之羅馬，述字母表第一百四十八。業無虛課，學舉其大，述大學校表第一百四十九。起訖有期，計程就師，述學期表第一百四十九重複。七日一休，而戒曠修，述官學校學生課日表第一百五十。可以爲師，而恥不知，述師範校及習師會表第一百五十一。入學視年，注籍於先，述學校師生繫地表第一百五十二。費不皆官，益被單寒，述學費表第一百五十三。自嚴亥豕，素餐則恥，述學校師薪水繫地表第一百五十四。其義學乎？亦古爲徒，述非官立小學校師增減表第一百五十五。六歲其始，罔判都鄙，男女皆然，有進無止，述小學校表第一百五十六。與未學殊，別爲一途，述不學人表第一百五十七。或其事編，或其人傳，聊擴班志，象譯魚筌。述藝文第一百五十八。紀念紀戰，往往而見，藉曰獵奇，奇非其羨，述金石第一百五十九以上《文學志》。向歆奏書，自敘豈虛，此何足數，而力亦餘，述自敘第一百六十。圖經例同，以補而通，述凡例補第一百六十一。此非彼例，法立文繫，述專例第一百六十二。

美利加經緯表小敘

美利加經緯起算一以中國爲宗，與日本經緯同一例也。以其都城言，曰華盛頓表內華盛頓乃其一部名，非都也，以其都之地名言，則曰科倫布亞，其緯度在英綠威西七十七度，而在我京都南一度，此面彼背，氣候亦無大異。科倫布亞華盛頓都不言經度起止者，地無幾也。合衆國緯線起赤道二十五度，訖四十九度，經線起英西六十六度四十分，訖一百二十五度三十二分，以中國京都論則起偏東一百一十四度四十分嘉里符尼亞，訖一百七十三度三十二分，緬而阿拉士格不在其內。南北爲經，東西爲緯，見《說文》、《釋名》、《周禮疏》諸書，蓋古誼也。述經緯表。

中國美利加月朔表小敘

西紀以三百六十五日爲一年，其二月之日二十有八，其四月、六月、九月、十一月之日三十，餘皆三十一日，四年閏一日，即《周髀》所謂三百六十五日者三，三百六十六日者一也。厥法匪自西始，美利加合衆國沿之。其立國始乾隆四十一年，至於今光緒十五年，凡一百十有四。同治十二年以後，日本亦從西紀，與中國月朔異同已見《日本圖經》，此不贅言。《日本圖經》所未逮者，雲龍第四子范冕、第七子范成，依年與月與日排比之，第二子范初斟訂之。述中國美利加月朔表。

美利加寒暖平均表小敘

氣候寒暖，未必不由地質與水性，然視日光轉移居多。中國當地面之北溫帶，而美利加則居地背之北溫帶，春分秋分，日行赤道，中國與美利加均非極熱之時，春分後日漸北而漸暖同，秋分後日漸南而漸寒又同。同一溫帶，背面異，寒暖無異，地動之說益信。然北溫帶北與赤道遠，南與赤道近，是以美利加合衆國氣候亦有差。科倫布亞爲華盛頓都，無嚴寒亦無酷熱，伊利那倚斯邦、剛色斯邦、根得基邦、瑪理蘭邦、密蘇釐邦、賓夕佛尼亞邦、田捏西邦、威士干遜邦、紐墨西哥部，蓋均得氣之和者也。緬邦之北多山，故偏於寒，紐罕布西耳邦，窪蒙邦，皆似之，愛呵窪邦寒於密蘇釐，而魯西阿納邦在阿拉巴麻、密士昔比之南，寒度較增，豈風爲之耶？德格瑟斯邦寒暖互異，地廣故也。梅尼所達邦之河冰輒半年乃泮，然而雪少，其近英屬地加納大處雪輒歲積百有奇。嘉里符尼亞夏暑甚，而海風吹盪，沿海雨尠，夜輒有霧。諾司喀爾勒那邦濱海一帶地溼，頗里根和暖而多雨，倭海約邦、英釐納邦，皆較賓夕佛尼亞爲稍暖，馬沙朱色士邦、洛答埃倫邦、干捏底嘎奪邦，亦略相等，而紐約邦有增。阿拉巴麻邦、密士昔比邦，向南益暖，佛勒里答邦則爲合衆國極暖者也。綜而論之，北界與中國直隸及四十餘度外之奉天伊犁相似，漸南漸溫，歲雪不及百日，南界尠雪，與中國廣東等，而較墨西哥熱度猶減也。美利加測量氣候就一歲之寒暖而平均之，述寒暖平均表。

美利加晴雨表小敘

地背聯邦牙錯，而晴雨有同有不同，無他，地氣與空氣爲之也。大氏溼爲熱，散則雨少，熱爲溼，鬱則雨多。嘗聞中國四川俗稱漏天，言雨多也，然未若美利加之阿拉士克，一年三百六十日而雨居一百八十五日，夏日晝短，晴亦無幾，其他三十七邦部與中國無甚差違。日光之向背以南北異，水氣之溼熱以高低異，即彼一邦亦未可概論也。凡以日計，皆測自美利加人，以數年例常年，非臆說矣。即晴雨之多寡可知地脈之美惡，而以風雪之屬附識於篇。述晴雨表。

美利加地理圖小敘

自神農計里爲地圖權輿，而九州之圖言於周官，秦之地圖言於《漢·地理志》。說者謂繪圖之法以晉裴氏爲得，惜無精之者。至我大清康熙間，命鑄銅版二圖，上符天度，近極則斂，近赤道則侈，此一定法也。以專門而精，以晚出而密，非智過人，抑時使然歟。美利加合衆國在我京都緯南一度，科侖布亞華盛頓都城而外，凡邦三十有八，部十，然阿拉士克一部新售自俄羅斯，不相聯屬，是以未克合而圖之。分圖屬草矣，而未遑鏤，且未遑繪，時迫之也。總圖銅版鏤自雲龍游歷日本時，蓋陰文也，而印之於紙即爲陽文，側聞康熙間殿版之圖鏤銅已用是法矣。述地理圖。

美利加合衆國方里表小敘

美利加合衆國沿英里法，每一英里合華二里有三百二十步四尺八寸六分五釐，每一英里合華八里有二百四十步一十四尺五寸九分五釐。雖然，自來計里以一英方里合九華里，是爲華三方里矣，今用其例，舉成數也。合衆國方里其說亦未畫一，或云三百有一萬英方里，增阿拉士克三十五萬，凡三百三十六萬方英里，而雲龍徵之圖冊分合數，則以三百六十萬二千九百九十八方英里爲符，以一合三，是爲華方里一千八十萬八千九百九十四。或言陸方英里三千萬，譌也，水陸分之，測有未盡，難可臆度。述合衆國方里表。

美利加四至八到表小敘

嘗見謝清高《海錄》，言咩里千國，海中孤島也，疆域稍狹，原爲英吉利所分封，毋乃誤歟？殆未親歷故也。咩里千即美利加之音轉，在中國地背聯邦如此，而曰『孤島稍狹』，豈圖亦未見耶？今依《元和郡縣志》例，述四至八到表。

美利加合衆國名稱歸一表小敘

依音譯地，文人人殊，莫不曰音轉居多，而亦難概論。即如美利堅，義大利人也，美利加則

言美利堅所探之地，不言堅，省文也，謂『堅』、『加』音轉，非也。廣東人謂美利加曰花旗，然《瀛環志略》謂白點爲繪北斗，則臆說也。白點視邦數增減，今三十八邦，點數正符，其橫道赤黑則部也。紐之言新，諾之言北，叟之言南，知其誼可也，以誼易音不可也。音誼既非一例，依違難用兩端，非果於自信，亦聊免歧出云爾。依馮繼先《春秋名號歸一圖》述合衆國名稱歸一表。

美利加邦部方類小敘

方以類聚，非臆爲類也。美利加十三邦指立國時盟邦言，其他曰二路，曰四土，曰五路，曰六部，若此之類，或以時更，或以事屬，不董理之，徒眩目耳。述邦部方類。

美利加合衆國形勢小敘

美利加合衆國在中國之東，就阿美利加洲言，則在其北，與南阿美利加洲界連，形若蜂腰。秘魯巴西諸國皆在南洲，即北阿美利加洲之西北阿拉士克部，即美利加售自俄羅斯屬地者也。北爲英屬地加納大，南爲墨西哥國。北洲之中是爲合衆國，其地位當中國之背，晝夜相反，廣狹小異。就經緯線考之，中國與美利加各居經度五十有七，其緯度則中國約三十度有奇，美利加約二十四度有奇。東南北三方陸海兩無大殊，惟西則中國界陸爲印度諸國，美利加界太平

洋，此爲不同。西人謂五大洲三分水一分地，畫地百分，中國居四，美利加居六，此非就廣狹言，蓋就地去水而實測之且平均之也。美利加地勢有山有水有平地，畫平地爲三，一界押山東，一界落機山西，一居二山間也。其東境押山距海岸數百英里，約華里一千數百，由東北以至東南，山漸低則地漸廣，離海亦漸云遠，其西境落機山起洲之西北，穿英屬地而入美利加合衆國境，由西北而南訖於墨西哥國，距太平洋約十度，西地廣二千里，約華里六千。其國河源多出兩山，厥派無慮數百。六大湖在國之東北，而此三分之二之地東界押山而極之海，謂之壓瀾低平地，西界落機山而極之洋，謂之太平洋平地，中界兩山，地平且廣，謂之密士昔比河谷平地，故曰地分三也。合衆國之形如三足鼎，而東北微形不足，佛勒里答邦其東足也，德格瑟斯邦南境其中足也，嘉里符尼亞邦之下嘉里符尼亞其西足也，徧按五大洲分圖，界線如井田，惟美利加合衆國居多，然四方形贏縮者獨喀那拉奪邦歪阿明部耳。於分見合，復於合見分。述合衆國形勢。

美利加合衆國都小敘

海外國都無所謂城，微獨美利加合衆國然也。伯理璽天德所居了無異人，蓋合衆國知有議院而已，虛語宮室，非其實也。述合衆國都。